

EL PASO A MANDA 450 HENDE CAS NA HOUSTON

ORANJESTAD (AAN): E compania El Paso cu a compra Coastal na Merca y na Aruba, a tuma e prome pasonan caba pa reorganiza Coastal y na Merca ya medidanan drastico a worde tuma riba tereno laboral y organisorio pasobra un grupo grandi di hende a worde

manda cas.

El Paso a manda 450 hende di Coastal na Houston cas y tur hende a haya pakete di oferta cu riba su mes tabata uno hopi atractivo.

E compania nobo ta uno cu ta move riba tereno di gas y no di petroleo manera cu Coastal na Aruba ta haci y ta pesey tin hopi speculation

encuanto kico lo bay para di e refineria na Aruba, pero por lo pronto na Aruba ningun hende por worde manda cas sin mas manera cu na Merca si ta e caso.

Na Merca un doño di trabao por kita un trahador hopi mas facil y hopi mas liher cu na Aruba pasobra nan leynan ta

diferencia di dia pa anochi cu esnan di nos.

Loke a tuma lugar na Houston no por pasa aki pasobra na Aruba leynan laboral ta duna e trahador proteccion cu e no por worde kita di un dia pa otro ni si un otro compania cumpra e compania caminda cu e trahador ta trahando.

Fuera di e rumornan cu tabata core cu trahadornan na Coastal Aruba ta den incertidumbre kico e compania nobo yama El Paso ta bay haci cu e refineria na Aruba, tin otro informacionnan ta circula den e direccion positivo cu aparentemente tin companianan multinacional cu ta interesa pa cumpra e refineria na Aruba relaciona cu petroleo cu lo tin den awanan teritorial di Aruba.

Den pasado testnan a ser haci pa trata na haya sa si enberdad tabata tin petroleo den awanan teritorial di

Aruba, pero e tempo ey supuestamente e pruebanan a duna di conoce cu no tabata tin petroleo.

Tin cierto informacionnan a cuminza leak cu ta indica no ta berdad cu den awa di Aruba no lo tin petroleo pasobra lo contrario lo ta e caso y ta pesey cierto companianan grandi den e mundo di petroleo ta interesa den e refineria na Aruba, pero cu e opcion pa haya e derecho pa por explota e petroleo cu tin den awanan di Aruba.

Si Aruba yega asina leu cu enberdad lo bay over na cuminza saca petroleo den awanan teritorial di e isla, esaki lo bay encera cu Aruba lo haya un entrada hopi clave y cu lo bay haci e isla uno cu un posicion financieramente hopi firme y cu nos no lo mester depende solamente riba turismo y comercio di zona franca.